

Zeitschrift: Annalas da la Societad Retorumantscha

Herausgeber: Societad Retorumantscha

Band: 109 (1996)

Artikel: En connex cun Endre

Autor: Berther, Toni

DOI: <https://doi.org/10.5169/seals-236190>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 09.07.2025

ETH-Bibliothek Zürich, E-Periodica, <https://www.e-periodica.ch>

En connex cun Endre

Toni Berther

Mes enconuschent era entrà en Svizra sco fugitiv tard l'atun 1956. Jau l'hai entupà l'emprima giada en in local da spetga da l'uffizi da vehichels a motor. El vuleva in numer da moto. El aveva chavels bain stritgads enavos, vivs egls e pertava ina cravatta, sco sch'el fiss almain in diplomat u in spus, era sch'el era vestgì simpelet.

El era vairamain spus, sco ch'el m'ha raquintà pli tard. Quel di n'hai jau betg pudì tschantschar cun el. Co vulev'jau discurrer ungarais e co duev'el tschantschar cun mai. Jau l'hai salidà sco ils auters e sun passà sper la retscha vi. Pauc pli tard ha el chatschà il chau en dad isch da mes biro. Sin fundament da ses document hai jau constatà ch'el era in giuvnot da 27 onns ed aveva num Endre. Jau hai alura fatg stim ch'el avev'ina parita in pau pallida per ses onns ed in'egliada svelta che rendeva el in tip abel per inqual surprisa. Dapi lura l'hai jau scuntrà mo sporadicamain.

1991 hai jau dumandà Endre, sch'el na vuless betg raquintar in pau, co ch'i saja ì cun el en Svizra. El ha ditg da gea, ch'jau stoppia dentant spetgar enfin l'enviern. La stad saja el bler en viadi cun il velo, ed alura na saja el betg disponì la saira per interviews. Sur Nadal e Bumaun haja el temp.

* * *

Questa sentupada sporadica ha sveglià en mai regurdientschas da la fin da la guerra. Jau era en l'internat e ma ragord anc bain dals 9 da matg 1945 ch'ins aveva proclamà la pasch. Ils zains da l'entir conturn sunavan. Nus scolars avevan già in di liber per far ina spassegiada viador en la primavaira. Tut fascheva la parita da speranza e legria. En quest mument d'allegrament general n'avevan nus giuvenils strusch pensà a las plajas sgarschaivlas suffridas dals Ungarais e d'auters pievels. Nus ans eran simplamain legrads da la terrada dal socialissem naziunal.

L'Ungaria era stada da la vart dals Tudestgs cunter la Jugoslavia e cunter l'Uniun sovietica. L'onn 1944 era l'Ungaria daventada in champ da battaglia tranter ils Tudestgs ed ils Soviets. La guerra era strusch a fin ch'ils Ungarais avevan arranschà elecziuns. La «Kleinbauernpartei»

aveva remportà la victoria cun la maioritad da vuschs absoluta. Ma già tar las elecziuns parlamentaras dal 1947 era il bloc sanester a la testa, sustegnì da la pussanza sovietica. Tuttas partidas cuntrarias eran vegnidias supprimidas e la suffrientscha aveva entschavì danovamain. Il 1948 era penetrà il stalinissem en l'Ungaria. Sut la batgetta da Matias Rakosi avevan già lieu process spectaculars e terrurs.

Da quest temp hai jau dudì da Jozsef Mindszenty, cardinal e primas da l'Ungaria, in grond cumbattant per la libertad religiusa. El era s'exponì vehementamain cunter il communissem, malgrà la dictatura creschenta. La suppressiun era sa dada successivamain, l'emprim temp cun in pau toleranza murt la dependenza da l'America. Dasper aveva l'armada russa commess tantas crudaivladads e violenzas vers la populažun ungaraisa ch'i regeva in odi profund cunter il communissem, perfin tar simpatisants da la Russia. La tactica dentant era raffinada e pressiun vegniva sustegnida decisivamain da las baionettas dirigidas nà da Moscau. In pajais suenter l'auter (sut l'influenza sovietica tenor la conferenza da Yalta, sco Terra tudestga da l'ost, Pologna, Tschecoslovačchia, Ungaria, Rumenia, Bulgaria) eran vegnids sclavinads politica-main. A partir da quest mument era la regenza ungaraisa ferm'avunda per cumbatter las baselgias, en emprima lingia quella catolica ch'era la pli ferma en l'Ungaria. La proprietad era vegnida confiscada tras la refurma fundaria, e la baselgia aveva pers qua tras sia independenza. Las scolas eran vegnidas puttameſſas al stadi, tant las catolicas sco las protestantas. Las organisaziuns da giuentetgna eran vegnidas schliadas. Ins aveva empruvà da crear baselgias statalas.

In'opposiziun consequenta era pia sa formada sut l'egida da Jozsef cardinal Mindszenty ch'aveva già fatg frunt al socialissem naziunal. El aveva gughegià da s'opponer a las ovras sgarschaivlas da l'armada cot-schna. Malgrà las nauschas attatgas era el restà ferm en brevs pastoralas e tar otras chaschuns. La pussaivladad d'al far taschair era sa dada il zercladur 1948 suenter la mort d'in policist durant ina demonstraziun per la libertad da cardientscha. Ins aveva instradà in process da propaganda cunter il plevon dal vitg ch'era vegnì sentenzià a la mort (chasti transfurmà en vita duranta). Da Nadal 1948 era il cardinal vegnì arrestà e sentenzià a lavur sfurzada per vita duranta. El na dastgava betg exequir ses uffizi e sia proprietad era vegnida confiscada. Il cumbat dentant era ì vinavant, era sche las baselgias avevan stuì s'adattar. Er auters dignitaris da las baselgias eran vegnids chastiads e mess en praschun. Tgi che n'obediva betg, vegniva diffamà publicmain. A la fin

da l'onn 1952 eran ils pli impurtants represchentants da las differentas confessiuns en praschun u privads da lur uffizis ed uschia senza pus-sanza.

* * *

Il schaner 1992 ha Endre raquintà da ses temp d'uffanza. El aveva passentà ils emprims onns en ina simpla chasa d'in vitget situà al cun-fin da la Jugoslavia. Da qua davent avevan ils Tudestgs attatgà il 1940 la Jugoslavia. Ils Tudestgs avevan la lubientscha da marschar tras l'Ungaria. El, Endre, aveva gist cumenzà ad ir a scola. El aveva ina tabla da crap cun in rom da lain. Ina giada aveva el laschè dar ella giun plaun, per fortuna n'era ella betg rutta, uschia aveva el pudì emprender vinavant a scriver. Els avevan retschas da bance da quatter. En lur re-giun avevi era conts, sco quai ch'igl aveva pli baud en l'entir'Ungaria. La famiglia aristocrata sa numnava Dichy. Da temp en temp avevan ils uffants da sa metter en colonnas da dus, ed els retschavevan dal cont per Nadal risplis u palpìri da scriver. (Nus avevan en scola primara las medemas relaziuns avant la guerra mundiala, era tablas da crap e grif-fels, ed en mintga banc eran nus traïs u quatter in sper l'auter. Ma nus n'avevan naginas famiglias da conts.)

Ses bab era mort baud ed els eran vegnids tar in aug en la vischinanza da la Donau. Da quest temp transportavan ils Tudestgs schuldada cun il tren a la front en Russia. Ma da quai n'aveva Endre betg encorschì bler. Percunter avevan els vis sutmarins sin la Donau. Els eran là a la riva a far bogn. Quels monsters eran sin via vers la Mar naira. L'emprim da november 1944 dentant eran ils Russ gia en la vischinanza da ses lieu. Eroplans tudestgs sgulavan ed ils Russ fugivan sut ils camiuns e sajettavan cun buis en l'aria. Da quest temp era el emprendist da muliner tar ses aug ch'aveva in grond mulin. Blers Russ eran ve-gnids en il mulin. Ils vegls eran buna glieud e zunt religiusa. Ils giuvens percunter eran vegnids educads sut Stalin. Ed el aveva ditg: *Jau sun protestant. Ma mes aug è catolic e zunt cartent. Jau gieva savens cun el en baselgia. Ina giada eran entrads dus Russ cun mitraglias. Els avevan schizunt fîmà en baselgia. Ils cartents eran restads là senza far mucs. L'organist sunava bain e quai plascheva als Russ. Alur aveva l'organist fatg ina pausa, ed il plevon era vegnì ord teschamber. In Russ aveva clamà al plevon: Chala da far tanta propaganda, pro-paganda avunda. Alur aveva l'organist puspè entschet a sunar.*

Nus avevan ieli en il mulin. Ils Russ duvravan ieli da maschinas per la cuschina. Ina sonda aveva la dunna da l'aug fatg gulasch da pulaster. Dus Russ eran vegnids ed avevan sentì l'odur. Els vulevan restar a gentar. Nus avevan zuppà il bun gulasch ed avevan stgaudà si rauba veglia cun ieli da maschinas e servi quella als Russ.

Nus n'avevan pli nagan'electricitat per far ir il mulin, ma avunda da mangiar en reserva. In Russ aveva ditg al patrun: Dà a nus da mangiar, uschiglio es ti da la mort. Blers Russ eran brutals e violents. Uschia eran dus Russ en la vischinanza da nossa chasa, pia en il medem quartier. Els eran entrads en ina chasa nua ch'igl avev'in um giuven e sia dunna cun in uffant. In Russ aveva tschiffà la dunna ed era ì cun ella en chombra. Il pur giuven aveva prendì la manera ed aveva pitgà l'auter Russ ch'el era crudà a terra. Quai aveva dudì il Russ en chombra. El aveva prendì sia buis ed aveva sajettà giu l'um giuven, la dunna e l'uffant ed anc otras persunas ch'eran vegnidas natiers.

Stalin era mort il mars 1953. Igl aveva già num: «Noss papa Stalin è mort», e las bandieras eran stadas a mes'asta. Nus avevan stuì ans metter per terra e clamar: «Papa Stalin è mort». Imre Nagy era vegnì president da l'Ungaria suenter la mort da Stalin. El aveva ristgà da dismetter successivamain la collectivaziun sfurzada tar ils purs e d'introducir il sistem democratic da dretg e giustia. Sut ils secretaris generals russ Malenkov e Cruschtschev aveva el chapì da promover la libertad dal singul e derasar fidanza tar il pievel. Igl aveva alura dà bainspert in nausch cumbat tranter Imre Nagy e Matias Rakosi. Gia 1955 aveva Nagy stuì sa retrair sco president da l'Ungaria e far plaz a Hegedüs che vuleva far impressiun cun parolas e fintas da buna coexistenza.

Endre ha ditg verbalmain: *Da quel temp sun jau stà ina giada en in cabaret. In giugadur trajeva suenter sin la tribuna in maletg da Rákosi. El aveva fatg sco da dumandar il public: Tge duai jau far? Ed el aveva sez respundì: Quel pend jau si. Da quel temp devi pliras partidas, per exemplu la «Kleinbauernpartei».*

* * *

Il mument che mes enconuschent ha raquintà da la «Kleinbauernpartei» e menziunà la revolta da 1956 sun jau stà attent. Da lez temp er'jau savens en cumpagnia da camarats, ed en noss entussiassem giuvenil per il spiert da libertad eran nus fieus e flomma per la «Kleinbauernpartei» e la revoluziun dal pievel. Nus vulevan sezs fundar ina tala partida ed

alur ir en agid als liberaturs da l'Ungaria. En mintga cas persequitavan nus giuvens cun grond interess il svilup da la revolta. Nus guardavan ils maletgs en las gasettas e tadtawan radio. Maletgs da giuvnots che attatgavan tancs russ cun buttiglias da benzin. Massa pievel avant la statua da la libertad. Maletgs da confraternitad tranter schuldada ungaraisa ed il pievel. Maletgs da larmas suenter la suppressiun da la revolta. Nus eran deprimids perquai ch'il vest n'interprendeva nagut. Nums sco Imre Nagy, Pal Maleter u Jozsef cardinal Mindszenty eran per nus si per la detta.

L'octobre 1956 spendran ils protestants lur manaders ed ils catolics Jozsef cardinal Mindszenty da ses lieu d'arrest. El vegn retschavì plain entussiassem a Budapest. Otg onns era el stà il simbol da l'entir pievel cartent. El aveva giavischà da reprender il contact cun ils represchentants da las baselgias e sperava da chattar la dretga via per la baselgia e l'Ungaria insumma. Ils 31 d'octobre 1956 aveva annunzià il radio Budapest in communiqué, tenor il qual las reproschas cunter Jozsef cardinal Mindszenty eran revocadas ed annulladas. En quest mument aveva la regenza d'Imre Nagy constatà ch'il chasti da 1949 era stà malgist. Ina malgiustia sco anc bleras ulteriuras cunter autres persunas. En quest temp avev'ins er pudì applaudir la veginida dal generalliberatur da Budapest, Pal Maleter. El aveva savì da bell'entschatta per quala vart che ses cor battess. Da ses quartier aveva el cumbattì cunter ils agressurs russ.

Il president da la regenza, Imre Nagy, aveva tegnì in pled al radio l'emprim di da novembre 1956 e declarà la neutralitat da l'Ungaria e l'extrada dal Patg da Warschau. Il pievel ungarais giavischia da viver en pasch cun ils pievels da tut il mund, tenor il spiert da l'ONU.

Blers eran stads patriots, eran sa rebalzads sco eroxs, avevan tegnì la dira ed eran pli tard veginids mess vid la furtga, perquai ch'els avevan defendì l'idea da la libertad, per exempl Imre Nagy e Pal Maleter. Jozsef cardinal Mindszenty era veginì spindrà. El aveva chattà refugi en l'ambassada americana a Budapest. Blers eran sa revoltads ed eran veginids sut ils tancs sovietics u restads en la sclaveria.

Auters avevan prendì la chaschun da la perioda malsegira ed eran scappads en il vest. (Nus giuvens Svizzers eran da l'idea che l'Ungaria fiss stada da spendrar, sch'il vest avess agì curaschusamain. Ed oz pon ins vairamain leger en cudeschs ch'ins avess lezza giada pudì liberar l'Ungaria da la grifla russa.) Ma la tirannia aveva cuntuà sut Janos Kadar.

* * *

Pli tard raquinta mes enconuschent da l'atun 1956, temp da l'emigrazione: *Nus eran fugids en traïs. Da quel temp lavurav'jau en ina miniera. Nus avevan chattà ch'igl era ussa nairas uras da partir. Nus n'avevan betg fatg grondas ponderaziuns. Il principal era da mitschar senza pensar a l'avegnir. Nus vulevan ir en in pajais nua ch'ins pudeva viver en pasch. Scappar dals guardians e dals spiuns. Nus na dastgavan mai tschantschar avertamain. Mo sch'ins era en la partida comunista avev'ins schanzas da survegnir in bun post. Al cumenzament vegnivi adina dumandà: Es ti en la partida?*

L'emprim mument vulevan nus scappar en Jugoslavia e da la en l'Austria. Ins aveva scusseglià a nus da far quai perquai che la Jugoslavia ans tramettess enavos. Uschia eran nus mitschads vers il vest. Ils trens eran plains. Igl aveva blera glieud en fugia. En la vischianza dals cunfins eran nus sortids e marschads tras guauds, palids e cultiras. Dus guardias da cunfin ungaraisas ans avevan mussà passagis senza minas. Da quest temp era la revolta gia supprimida. Nus avevan dà als guardians noss forints e liquidà las formalitads. En quel mument eran arrivads dus schuldads russ cun pistolas automaticas. Ils dus guardians ungaraais avevan ditg ch'els na possian far nagut pli en questa situaziun. Nus eran vegnids transportads cun autos armads al chastè d'Estherhazy. En quest lieu aveva entschavì l'interrogaziun tras in uffizier russ, forsa in colonel. El m'aveva dumandà pertge ch'jau veglia ir al vest. Sco in chametg avev'jau respundi: «Jau hai in sbagl dal cor, ed a Vienna datti in spezialist per talas malsognas». Sin quai aveva il colonel ditg: «I dat er a Budapest spezialists, in Russ per exempl». E lur avev'jau ditg: «Jau n'hai betg raps per turnar a Budapest». Il colonel m'aveva dà sin quai forints per il return en la chapitala ungaraisa.

Ina dunna da la cuntrabanda aveva manà nus al cunfin. Nus l'avevan pajada cun ils daners dal colonel russ. Avant che pajar avevan nus vulì esser segirs ch'ella ans manass en il dretg lieu. Igl era saira e fitg stgir. Tuttenina sbrinzlan glischs. Nus eran stads zunt tementads: uss èsi finì! Per cletg e ventira eran quels da las glischs Austriacs. I sa tractava da guardias da cunfin. Nus eran sco en il settavel tschiel. «Vus na stuais betg pli avair tema», avevan els ditg. «Giai en questa direcziun, là sa chatta in vitg e là pon ins dir nua che vus avais dad ir». En quel vitg era l'emprim champ da recepziun. Nus avevan survegnì da mangiar e da baiver. Nus eran in'entira cumpagnia. Igl aveva qua automats da musica che nus n'avevan anc mai vis en l'Ungaria.

Nus avevan pruvà d'als far ir cun forints dal colonel russ, ed ils apparts avevan propri funcziunà. Quai era stà per nus l'emprima fascinaziun en la libertad.

Paucs dis pli tard eran nus vegnids en in champ per fugitivs: Kloster-Neuburg. Qua avevan nus retschavì biancaria e vestgadira ed era da mangiar e da baiver. Nus povers galiots avevan vairamain mo il pli necessari cun nus. A Kloster-Neuburg eran nus restads circa in'emma. Tut ils Ungarais vulevan ir en l'America. Quai ans pareva il pli simpel. Insatgi aveva ditg ch'ins stoppia spetgar passa trais mais per il transport sur mar. Alur era vegnida ina persuna ch'aveva ditg: Ils protestants, evangelists e refurmads pon s'annunziar per la Svizra. Jau m'era annunzià ed auters medemamain. Trais dis pli tard eran arrivads autobus da la Crusch cotschna svizra. Noss numbs eran nudads sin glistas, e nus eran entrads en bus moderns ch'ans avevan manads a la staziun-vest da Vienna. Là eran nus vegnids retschavids da personal da la svizra. Nus eran viagiads in'entira notg ed eran vegnids pupergnads cun tschigulatta e cigarettas. En l'Ungaria eran quels artitgels in luxus. A Buchs aveva insatgi fatg bainvegni a nus en ungaraïs. Lura eran nus viagiads vinavant enfin Cuiria. Là eran nus vegnids retschavids da blera glieud. Nus ans eran sentids sco eroxs en quest mument. Dasper eran nus povers fugitivs. Jau aveva mangià tschigulatta e fimà tutta notg, uschia ch'jau ma sentiva fitg mal a l'arrivada. Pauc pli tard eran nus vegnids transportads cun in bus en la caserna. Nus avevan già la pasch ed ils culms surtratgs cun naiv ans avevan fatg grond'impressiun. En l'Ungaria, da la vart da Pesta, datti mo planiras, tschients kilometers da planiras. Il schef dals fugitivs era in chapitani da l'armada svizra. El era in bunatsch ed ans vuleva regalar tschigulatta. Jau hai stuì dir da na. Jau n'aveva betg pli quaida. Quel chapitani ha già da cussegliai mai pli tard en civil ed el m'ha entupà ina giada en in'ustaria. El ha clamà gentilmain vers mai: «Vus dastgais ruassaivlamain baiver vossa biera». Jau hai adina già gugent biera.

* * *

Ensasez era Endre vegnì repartì sin il chantun d'Argovia. El ha den-tant pudì mussar si ch'el aveva in'amia en il Grischun, er'ella ina fugitiva da l'Ungaria. I sa tractava gea er da francar colliaments tranter fugitivs.

Endre era s'allontanà ina giada senza lubientscha dal champ provisori. El aveva fatg ina visita a sia amia ch'era gia pli ditg en Svizra e ch'abitava en in vitg dasper Cuira. Schuldads svizzers survegliavan. Endre era vegnì arrestà e mess en in local sutterran dal champ. Là aveva el gì la cucagna e pudì durmir e mangiar en abundanza. Pli tard l'aveva il guardian militar ditg ina giada en civil ch'el stettia mal d'avair arrestà el, ma ch'el na pudeva betg far auter sco guardian. Oz è questa persuna in um cun chavels alvs en la vegliadetgna da pensiunari.

Nus avevan a l'entschatta pauca vestgadira. Nus avevan survegnì buna rauba da traer en. Jau aveva survegnì chalzers da skis, gronds avunda per mes pes lungs. Dus mais pli tard hai jau pudì ir a lavurar en las Ovras da Domat. A l'entschatta giev'jau a pe davent da Cuira a Domat e return. Jau n'aveva betg raps per in vehichel. Mia squadra durava da las 06.00 a las 14.00 u da las 14.00 a las 22.00. A las 14.00 devi in gentar stgaudà, ma in pli bun che quel che nus avevan dà a la schuldada russa 1944 en il mulin da mes aug.

Suenter nossas nozzas avevan nus chattà in'abitaziun a Cuira: ina chombra dubla mobigliada. L'uffizi da provediment ans aveva procurà pli tard in'abitaziun a Favugn. Là avevi in plevon refurmà che salidava adina cun: Buna saira. Perfin la damaun! L'emprim temp en fabrica avev'jau l'impressiun ch'ils collavuraturs n'audian betg bain. Els clamavan savens fitg dad aut «was» e «so». Pir pli tard hai jau enderschì che quai era il dialect tudentg da la regiun.

Suenter l'arrivada dals fugitivs avevi dà bleras maridaglias. Ins era sa gidà stediamain da metter ensemes parts. E la polizia d'esters aveva da funcziunar sco intermediatura e perditga.

Da quest temp aveva er mia dunna cumenzà a lavurar en la fabrica da Domat. Ella lavurav'adina da di, da las 06.00 a las 14.00 u da las 14.00 a las 22.00 h. Bain spert avev'jau comprà ina moto per ir a la lavur. (Perquai era el stà al spurtegl da la controlla da vehichels a motor, nua che nus ans eran entupads l'emprima giada). Jau prendeva la dunna cun mai sin la moto. Jau gieva per ella, cur ch'ella aveva in auter temp da lavur ch'jau. Nus avevan lavurà là trais onns per ina paja da 2.10 frs. il schaner 1957 e da 2.45 frs. il settember 1959. En in mais fascheva quai cun sururas circa 500.- francs, mia dunna guadagnava radund 260.- francs. Per l'abitaziun pajavan nus 60.- frs. il mais.

Da lez temp lavuravan blers Taliens en la fabrica. Ils asilants vegnivan tractads pli gentilmain. A l'entschatta survegnivan nus anc invitaziuns. Nus eran arrivads al cumenzament da december, e da

Nadal era in signur vegni ed aveva envidà tschintg da nus tar el a chasa. Nus avevan retschavì regals. La dunna aveva vulì far a nus in plaschair spezial ed aveva cuschinà lentiglias, insatge ch'ils Ungarais han fitg gugent.

Ina giada aveva ina secretaria pli veglia envidà ad ina tschaina. Ella era buna cun ses um e cun nus fugitivs. Nus avevan mangià bain e natiralmain bavì in pau vin. La secretaria supplitgava adina puspè ses um da chalar da baiver. Ma el aveva gugent in magiel vin.

Dapertut nua ch'jau hai lavurà, regeva urden. Cun «huarra Usländer» n'essan nus fugitivs ungarais mai vegnids titulads. L'emprim onn n'avevan nus betg stuì pajar las taglias. Pli tard en ellas vegnidas squintadas directamain da la paja, l'uschènumnada «taglia a la fantauna».

* * *

Suenter Favugn essan nus vegnids a star a Cuira. La dunna ha entschavì ad ir a servir. Pli tard ha ella lavurà en la fabrica da tschigu-latta Grisons. Jau na sun mai stà schef da finanzas a chasa. La dunna ma deva ils daners tenor basegn. Ina giada ha in Svizzer envidà mai a baiver ina biera. El ha svidà sia biera ed è s'allontanà senza pajar. Uschia èn ils Svizzers. Els dattan or raps mo per els. Jau hai stuì ir tar la dunna per ils raps. Quai e stà penibel. Ils buns onns 60 han possibilità a tuts da lavurar e gudagnar bain. Ins pudeva bunamain encuir or las plazzas. Raps eran avant maun, ed il singul era vegni independent e na stueva betg pli prender resguard sin l'auter. La dunna era plirs onns pli veglia. 1965 essan nus vegnids spartids. La dunna era pitschna e plitost stagna. Ella sa deva fadia da far la lavur en urden. Ella na scheva betg bler.

Ina giada hai jau scuntrà Endre casualmain sin via. Igl era il temp ch'ils Ungarais eran daditg integrads en nossa vita da lavur. Jau l'hai natiralmain dumandà co ch'el haja. El m'ha ditg che la lavur al plaschia, ma ch'el saja sulet. Jau na possia betg crair quant sulet ch'el saja. El saja bain dapi lung temp en Svizra, ma el na saja qua betg da chasa.

Endre aveva dà d'encleger ch'el veglia returnar en l'Ungaria. El era in fanaticher da vehichels a motor e vuleva returnar en l'Ungaria cun sia moto. El era ì al spurtegl da la polizia d'esters ed aveva dumandà las formalitads necessarias. Per cuntanschar il cunfin da l'Ungaria stuev'el passar l'Austria. El aveva sulettamain in pass da fugitiv. Austriacs avevan segiramain sezs avunda asilants, senz'anc retschaiver tals da la Svi-

zra. La polizia d'esters n'ha natiralmain betg retegnì l'um. Ella l'ha dà in laschapassar per traversar l'Austria. El era ì tar l'ambassada ungaraisa ed aveva ditg ch'el haja in frar che l'aveva envidà. Il represchentant aveva dà d'encleger che l'Ungaria na laschia betg pli entrar fugitivs che sajan stads uschè ditg en l'exteriur e na sajan betg pli burgais. El è arrivà enfin Heiligenkreuz/Burgenland. El di: *Là sun jau vegnì retschavì da schuldads ungarais. Ils schuldads han ditg ch'jau na possia betg passar. Els han scusseglià da far l'emprova da passar il cunfin illegalmain. Jau m'hai sentì infinitamain sulet ils emprims onns suenter il divorzi. Jau n'aveva era strusch contact cun auters Ungarais. Quels vegnivan sulettamain ensemen la sonda a dar gieus e baiver. I vegniva tschantschà bler tudestg. Ils blers han dunnas svizras u austriacas.*

Mia ex-dunna abitava sin il quart plaun ed jau sin il secund da la medema chasa. Uschia avevan nus contact, malgrà il divorzi. La sepultura da mia dunna ha custà 2000.- frs. La mesadad hai jau surprendì. Ils uffants han pajà l'autra mesadad. Il figl ha mess ensemen in curt curriculum vitae da la mamma. Avant la fugia abitava ella a Budapest, ma ella nun era da là. Mes figl è sco ils Svizzers. El paja ses daivets, ma betg quels dals auters. El vegn a tschentar la dumonda per daventar burgais svizzer. El lavura sco pictur. El stat en l'abitaziun da mia dunna. El ha ina ghitarra e prenda uras da sunar. El e naschì l'october 1965. La figlia è pli veglia. Ella maina il kiosk d'ina garascha. Ella ha savens da lavurar la sonda e dumengia. Uss sa sentan omadus bain en Svizra e èn cuntents cun la lavur. Nus avain buns contacts. Nus discurrin insemen dumondas da famiglia. Il contact dat tegn. (Jau hai già vis els trais ensemen ed hai era conuschi la dunna e mamma).

Jau hai er lavurà tar la «Buschwerke». Suenter sun jau stà a Bremgarten/Argovia en ina fabrica da plastic. La glieud en l'Argovia e pli averta e legra ch'en il Grischun. Els fan gugent festa, festas da musica u festas da guaud. Alur sun jau vegnì a Buchs/Son Gagl. Qua hai jau lavurà en ina fabrica da chemia, in manaschi da famiglia. Nus stuevan lavurar cun guants ed avevan savens da purtar mascras da gas. I sa tractava d'ina lavur privlusa. Ina giada avess jau prest pers la vesida. Jau sun sensibel sin savun lom. Mia sensibladad per meds chemics è stada il motiv da midar plazza.

* * *

Pensond a 1956 hai jau già avant egl l'entschatta da la conjunctura. En auters pajais, nua ch'ils pievels pativan da las destrucziuns da las guerras, ha la reconstrucziun entschavì en la paupradad da las ruinas. La Svizra n'aveva betg già la guerra devastanta. Nus avain clamà ils lavurants esters. Els èn vegnids perquai ch'els n'avevan betg lavur en l'atgna terra. Nus avain bajegià enavant sin noss bains intacts ed augmentà la bainstanza rapidamain cun agid dals lavurants da l'Italia, da l'Austria e da la Germania che lavuravan tar ils purs, en firmas ed en l'hotellaria.

Jau ma regord bain dal 1959: rotschas da lavurants esters èn arrivads sur ils cunfins ed èn sa mess en retscha per la controlla sanitara. Tuts stuevan esser sauns, per gea betg impestar noss pajais.

Tgi che lavurava illegalmain u commetteva in delict ristgava da vegnir bandegià. Ils esters avevan grond respect da las mesiras polizialas. Chastis cundiziunals na faschevan betg tant'impressiun sco las mesiras da la polizia d'esters da trametter els sur ils cunfins. Quai tutgava il viv. Els eran quasi tuts stagiunals ed avevan il dretg da lavur, ma er l'obligaziun da pajar la taglia e da turnar a chasa suenter la stagiun.

Ils onns 60 han autoritads ed auters gremis encorschì ch'ils lavurants esters n'eran betg sulettamain forzas da lavur, mabain umans sco nus. Il pled dal scriptur Max Frisch ha segiramain già effect. Nus essan ids per forzas da lavur, vegnids en umans. Cun il temp èn vegnids duvrads adina dapli sur onn. Els èn s'integrads pli e pli en nossa societad ed han survegnì suenter in tschert termin la lubientscha da prender en svizra er las famiglias.

La conjunctur'auta cun ses basegn per adina dapli forzas da lavur ha clamà in politicher sin las barricadas: James Schwarzenbach! El ha sveglià la populaziun svizra cun la pretensiun da laschar vegnir sulettamain tants esters en svizra sco quai ch'ins dovria propri. Il cussegl federal operescha dapi là cun prescripziuns restrictivas. Il chantun Grischun per exemplu aveva il 1972 represchentants da 71 differents pajais. La stagiun auta forsa 18'000 stagiunals e dasper circa 10% da la populaziun indigena annuals o domiciliads. I sa tractava adina da chattar il cumpromiss tranter ils basegns dals patruns, il cumbat da la surimmigrazion ed il tractament uman. En quest svilup economic èn ils fugitivs ungarais e tschecoslovacs vegnids integrads senza difficultads.

* * *

1975 eri grev da survegnir lavur murt la crisa da l'ielo. Curt temp hai jau lavurà en la chascharia d'Igis. Jau aveva ina ruttadira da las eglias ed hai stuì consultar il medi da chasa. El m'aveva tramess al spital da la Crusch a Cuira. Suenter abitav'jau puspè a Cuira.

In temp hai jau lavurà en ina pasternaria. Jau era in factotum. L'emprendist era da Maiavilla. El era in um grond e ferm. El mangiava tant sco ils auters quatter ensemes. Ina giada vuleva il patrun ch'jau gidass l'emprendist. El ha ditg: «Il signur professer sa er gidar». Questa titulaziun hai jau prendì per in'offensiun ed jau hai chalà da lavurar là. Jau hai adina già plaschair da ma vestgir bain ed elegant. In temp hai jau alura lavurà en la Chasa d'attempads e tgira evangelica, era en quest lieu sco factotum. Il damangiar era bun. Il cuschinier vegniva da la Surselva. Il temp liber era irregular.

Ch'Endre aveva difficultads da survegnir lavur enturn il 1975 è chapaivel. Il temp da la crisa d'ielo aveva fatg tremblar il mund. La dischoccupaziun aveva tutgà surtut ils esters en Svizra. Els eran in bun pulstrà. Ina curaisma era perquai stada supportabla per ils patruns da las differentas branschas. Ils impiegads da l'uffizi da lavur quintavan cun la lingiera, sch'ins veglia anc laschar vegnir esters en ina u l'autra firma. Mes enconuschenet senza scolaziun professiunala aveva sentì sez la crisa. El aveva stuì tschertgar occupaziuns provisorias. Sco fugitiv renconuschì n'aveva el dentant betg stuì temair da stuair bandunar la Svizra. Ma ils fugitivs n'eran betg pli ils eroxs dal 1956. Suenter quasi 20 onns stueva mintgin sa dustar sco ch'el pudeva.

* * *

Igl è stà la fin d'avril 1976, raquinta Endre, ch'jau hai cumenzà a lavurar a Seewis tar la firma Georg Fischer.

Jau hai alura già da far cun il cor. Jau sun stà tar il medi da chasa e lura tar il schef da la partiziun dal cor dal spital chantunal. Diagnosa: Angina pectoris. Dal spital chantunal sun jau vegnì transferì al spital «Petersgraben» a Basilea. Jau aveva ina temuna. Jau hai fimmà quel di almain in pachet cigaretas schegea che quai era scumandà. Jau sun vegnì mess en la part veglia. Sin in placat stevi scrit: Na prendai betg blers raps cun vus en chombra. Nus avain era qua glieud da la detta lunga. Laschai voss raps en noss deposit. Il medi superieur ha già ina bun'influenza sin mai. El m'ha quietà, ed jau n'hai betg pli già tema. Igl è stà ina grond'operaziun. Alura sun jau stà in temp

senza lavur. Pli tard hai jau lavurà mo mintga mez di tar Georg Fischer.

La glieud dal Partenz è plitost reservada visavi persunas da dador la Clus. Per els èn quels gia esters. La lavur era buna, ma il contact interuman mancava. Els na fidavan betg ad auters ed eran pauc solidarics. Tar la Georg Fischer SA lavurava in Tudestg, in um diligent. Ma quels dal Partenz l'han stgatschà. El e daventà Svizzer, tschantschà pero anc adina tudestg da scrittira. Oz ha el ina buna plaza tar il stadi, ma betg en il Partenz.

Jau na ma sent oz betg pli sco ester, ed era la glieud m'accepta. Quai è bel. I va uss bain cun mai. Ils blers Ungarais èn uss burgais svizzers. Jau hai fatg ina giada ina dumonda. La resosta è stada negativa. Jau hai la lubientscha da domicil. L'avugà uffizial ha adina già chapientscha per mai e mes fatgs finanzials. Sco ch'el ha ditg hai jau mess entaifer 15 onns bunamain 50'000.- francs sin banca. Quai rinforza l'avischinaziun. Pli baud n'aveva jau betg in da tschintg da la vart.

Lur ha el raquintà d'insaquants Ungarais arrivads da ses temp en il Grischun. Jau n'hai betg nudà tut ils numis, sulettamain dus: Dr. Danèr ed Esterhazy. Dr. Daner era plevon ad Andeer. El vegniva da Siebenbürgen. Là tschantschia la glieud rumen. E dr. Daner savev'era rumantsch. El è sa disgrazià cun l'auto l'onn 1962. Pli baud appartegneva l'entir Siebenbürgen a l'Ungaria. Suenter l'emprima guerra mundiala haja l'Ungaria stuì ceder quest territori a la Rumania ed auters territoris a la Jugoslavia ed a la Tschechoslovachia. L'Ungaria era avant l'emprima guerra mundiala traïs giadas pli gronda ch'oz.

Esterhazy era il num d'in chastè. Là eran els vegnids interrogads. Ma el aveva legì quest num era en il Principadi da Liechtenstein sur in kiosk nua ch'ins vendeva liongias ed auter. Esterhazy era inscrit en il cudesch da telefon. In um fitg simpel d'enturn 60 onns. Quai è sta 1972. La famiglia Esterhazy era parenta cun la duchessa Gina. Antruras avevan ils Esterhazys gronds territoris en l'Ungaria. Quai era ina famiglia nobla.

* * *

Pli baud aveva Endre en il chau sulettamain motos. Sch'el avess cumenzà d'ir cun velo cun 27 onns, fiss el forsa daventà in grond campiun. Uschia raquinta el cun entusiassem da ses viadis cun velo. L'ir

cun velo saja daventà ses hobi dapi 1980. La primavaira e la stad saja el adina en gir cun il velo il temp liber. El haja ì l'emprim in Cilo e cun quel haja el gì in grev accident sin via. L'avugà ufficial saja medemain in nar da velos. Lez giaja cun il velo sur ils pass alpins, el percunter mo en la planira. Uss haja el cumprà – cun consentiment da l'avugà – in supervelo da sport. Ins haja adattà las pedalas a sias chommas. El haja ina chomma pli curta che l'autra. El sa legria dal nov velo. Endre porta in vestgì da sport aerodinamic e da pliras colurs ed in velo propri da cursa.

El di ch'el avess interess d'ir en Ungaria. El vegnia ad ir en sia patria cun camarats e restar la quindesch dis u anc pli ditg en sia patria. Ma per adina na pudess el betg star en l'Ungaria. El saja bler pli ditg en Svizra. El na conuschia nagin pli en ses vitg natal. Ma el veglia ir sperasvi per guardar co che tut saja sa midà. Ins na dovria pli il visum per ir tras l'Austria. In pass bastia. Cur ch'el saja vegnì da l'Ungaria avant 35 onns saja el stà surstà ch'ins pudeva tschantschar qua en Svizra senza stuair temair sancziuns. En l'Ungaria ristgav'ins praschun. Oz è l'Ungaria pli libra. El veglia viagiar enfin Budapest cun il tren e lur atras la veglia patria cun il velo. Uschia s'entusiasmescha el per ses velo e sia veglia patria. El saja Ungarais e danovamain en possess d'in pass. El na saja mai pli stà en Ungaria dapi la revolta dal 1956, ma i giaja uss bain là, sco ch'el haja udì da pliras varts. Uss creschia la democrazia che schermigliava già sut il tiran Kadar.

* * *

1982 ha la confederaziun relaschà ina nova lescha da fugitivs. Pauc pli tard èn arrivadas rotschas da fugitivs sur ils cunfins. La svizra è daventada uschè ritga che blers esters vegnan dalunsch tar nus, er sch'els n'adempleschan betg las premissas da fugitivs. Pensain a las invasiuns da Sri Lanka, da la Turchia, da l'Exjugoslavia. Ils problems dals fugitivs surpassan ils cunfins d'in pajais ed èn da schliar mo en accordanza cun auters. Oz paran ils dretgs da recurs en la democrazia elavurads da maniera ch'il stadi ha fadia d'exequir las reglas prestabilidas. I para inqualgiada ch'il mez mund saja en moviment.

Endre raquinta: *Igl è fitg grev da s'avischinar als Svizzers. Jau ma sun dà fadia da bell'entschatta. En l'ustaria sesa mintga Svizzer persul vid ina maisa, enfin che tuttas maisas en occupadas. Els èn individualists. Sulettamain a la maisa canorta è quai auter. Oz sun jau*

acceptà. Jau ma sent pli fitg Svizzer che Ungarais. 1991, per ils 700 onns, hai jau comprà ina plachetta ed ina «swatch» cun si la vopna grischuna. 1954 aveva l'Ungaria ina buna equipa da ballapè. Ils Ungarais han giugà al campionadi mundial en Svizra ed èn daventads ils segunds suenter ils Tudestgs. Quai è stà dal temp che Imre Nagy era per curt temp president ed aveva inizià la democrazia en l'Ungaria.

1991 hai jau gì chaschun da spasseggiar pliras giadas sin la Via svizra. L'unitad en la diversitat hai jau sentì sco darar sin il bastiment ch'ans purtava al Rütli u en in auter lieu da destinaziun. La glieud discurreva cun nunenconuschents da l'entira Svizra e da l'exterior. Questa via en la Svizra centrala vegn a restar in'instituziun che dat curaschi da guardar cun spiert avert en l'avegnir. Nus avain emprendi dapi decennis da viver cun esters da l'entir'Europa, gea da l'entir mund. L'integraziun na pon ins betg dictar cun leschas e prescripziuns, ella è in process tranter ils indigens ed ils esters. Pli natirala che la convivenza è e pli tgunsch che l'accoglientscha succeda.

Mes enconuschent da l'Ungaria, ch'era tar nus dapi passa 35 onns, tschantschava anc adina da sia veglia patria, era sch'el era fugì per sa deliberar da la sclavaria. Jau aveva l'impressiun tar Endre ch'in fugitiv immigrà sco creschì na possia betg s'integrar cun corp ed olma en il nov pajais da recepziun. I vegn pero er ad esser insatge individual. Uss èn tants asilants en Svizra ch'ina assimiliaziun è anc bler pli greva.

Jau ma sun mez dumandà, pertge ch'ins sa senta anc adina lià cun il lieu d'origin, era suenter decennis. Da noss temp da giuventetgna stueva quasi mintgin bandunar l'atgna val. Il magher terratsch alpin na pudeva betg dar paun e gudogn als uffants da las grondas famiglias. Ils buns temps da conjunctura han permess da chattar domicil ed existenza en la Bassa. La professiun e la famiglia han occupà e tegnì si da frestg ils emigrads. Pir a l'ester sentan blers ch'ins sa nutresch'anc adina da l'umus da la stretga patria. Finas ragischs han adina tanschì enavos a l'origin.

Jau ma dumond mintgatant pertge che mes enconuschent pensa anc a ses pajais ch'in scriptur fugitiv aveva definì en sia resposta a la dumonda d'in schurnalist l'onn 1956, schebain blers Ungarais sajan stads en praschuns communistas? El ha ponderà in mument ed ha ditg: «Gea, blers, l'entir pievel».

Blers èn stads sfurzads da bandunar lur pajais per motivs politics u religius. Er la colur u il linguatg pon giugar ina rolla. Els van insanua e

na san savens betg en tge pajais ch'els vegnan, sco per exemplu Endre. Il fugitiv spetga e spera sin la vieuta democratica per pudair returnar! Il temp megliura plajas, ma la brama per la patria resta en ina moda u l'autra. Tar mes enconuschent è la speranza ida en vigur suenter 35 onns, il mument che l'Ungaria è daventada ina democrazia, ed el ha retschavì danovamain in pass ungarais.

L'Ungaria ha giugà ina rolla da pionier en la deliberaziun da l'Europa da l'Ost. Ils manaders ungarais han decidì il favrer 1989 da disfar la saiv da filfier cun spinas ed ils indrizs d'alarm als cunfins vers l'Austria. Quell'ovra ha già consequenzas politicas ch'han fatg sbalunar l'urden communist erigì da Moscau suenter la seconda guerra mondiala. L'entir sistem da l'ost e cupitgà: Berlin-ost, Varsovia, Prag, Sofia, Bucarest e pli tard il Balticum e l'entira structura sovietica. L'Ungaria ed ils auters pievels da l'Ost pon uss ir ina nova via democratica.

Endre vul renovar contacts cun ses pajais nativ. Il reschim communist l'aveva revocà il dretg da burgais. In nov pass ungarais dat segrezza e conscienza da sasez. El è cument e losch d'avair in'atgna patria. Sco fugitiv aveva el a sias uras stuì laschar confiscar il pass en Svizra.

* * *

Jau na sai betg sch'Endre ha visità l'Ungaria sco ch'el m'aveva ditg? A la fin da nossa segunda sentupada l'enviern 1992 ha el dumandà mai da l'interrogar pli tard puspè davart sia istorgia e quella da ses pajais per avair in mosaic in pau pli precis. Jau vuleva metter en scrit quai ch'el m'aveva raquintà enfin uss ed alura cuntinuar cun l'interrogar per cumplettar il maletg. Jau n'hai betg pli già chaschun da far ad el ulteriuras dumondas. Endre è sa disgrazià cun velo la stad 1993. Quel temp n'er'jau betg a Cuira ed hai dudì pir pli tard da l'accident tragic. Ruaussa en pasch, Endre.